

四庫全書

集部

欽定四庫全書

集部

南軒集

目錄
卷一至

詳校官庶吉士臣吳烜

主事臣呂雲棟覆勘

覆校官中書臣宋 銘

校對官中書臣石鴻漸

謄錄監生臣朱續曾

欽定四庫全書

集部四

南軒集

別集類三

宋

提要

臣等謹案南軒集四十四卷宋張栻撰栻字

敬夫廣漢人丞相浚之子以蔭補官孝宗時

歷左司員外郎除秘閣修撰終於荆湖北路

安撫使事蹟具宋史道學傳栻歿之後其弟

杓裒其故稿四巨編屬朱子論定朱子又訪

得四方學者所傳數十篇益以平日往還書疏
編次繕寫未及歲事而已有刻其別本流傳
者朱子以所刻之本多早年未定之論而未
年談經論事發明道要之語反多所佚遺乃
取前所蒐輯參互相校斷以栴晚歲之意定
為四十四卷併詳述所以改編之故弁於書
首即今所傳淳熙甲辰本也栴與朱子交最
善集中與朱子書凡七十有三首又有答問

四篇其間論辨斷斷不少假借如第二札則致疑於辭受之間第三札辨墓祭中元祭第四札辨太極圖說註第五六七札辨中庸註第八札辨游酢祠記第十札規朱子言語少和平第十一札論社倉之弊責以偏袒王安石第十五札辨胡氏所傳二程集不必追改戒以平心易氣第二十一札詳論仁之說有流弊第四十四札論山中諸詩語未和平第

四十九札論易說未安是從來許多意思未能放下第五十四札規以信陰陽家言擇葬地與胡季隨第五札又論朱子所編名臣言行錄未精細朱子並錄之集中不以為忤又棧學問淵源本出胡宏而與朱子第二十八札謂胡寅讀史管見病敗不可言其中有好處亦無完篇又第五十三札謂胡安國春秋傳其間多有合商量處朱子亦並錄之集中

不以為嫌足以見醇儒心術光明洞達無一毫黨同伐異之私後人執門戶之見一字一句無不回護殊失朱子之本意至朱子作張浚墓誌本據栻所作行狀故多溢美語錄載之甚明而編定是集乃削去浚行狀不載亦足見不以朋友之私害是非之公矣論張浚者往往遺議於朱子蓋未核是集也劉昌詩蘆浦筆記駁栻堯廟歌指堯廟在桂林失於

附會其歌今在集中蓋取其尊崇帝德而畧
其事實昌詩又錄栻慤齋銘稱栻奉其父命
為其弟杓作本集不載檢之良然然栻集即
杓所輯不應反漏考高斯得恥堂存稿有南
軒永州諸詩跋曰劉禹錫編柳子厚集斷至
永州以後少作不錄一篇南軒先生永州所
題三亭陸山諸詩時方二十餘歲興寄已落落
穆穆如此然求之集中則咸無焉豈編次者

以柳集之法裁之乎然則栴集外詩文皆朱
子刪其少作非偶佚矣乾隆四十三年恭校上

總纂官

臣紀昀 臣陸錫熊 臣孫士毅

總校

官 臣陸費墀

欽定四庫全書

集部四

南軒集目錄

別集類三 宋

卷一

詞

賦

古詩上

卷二

古詩中

卷三

古詩下

卷四

律詩一

卷五

律詩二

卷六

律詩三

卷七

律詩四

卷八

表

啟

卷九

記一

卷十

記二

卷十一

記三

卷十二

記四

卷十三

記五

卷十四

序上

卷十五

序下

卷十六

史論上

卷十七

史論下

卷十八

說

卷十九

書一

卷二十

書二

卷二十一

書三

卷二十二

書四

卷二十三

書五

卷二十四

書六

卷二十五

書七

卷二十六

書八

卷二十七

書九

卷二十八

書十

卷二十九

答問一

卷三十

答問二

卷三十一

答問三

卷三十二

答問四

卷三十三

題跋上

卷三十四

金石錄卷之二十一

目錄

題跋中

卷三十五

題跋下

卷三十六

銘

箴

贊

卷三十七

墓誌銘一

卷三十八

墓誌銘二

卷三十九

墓誌銘三

卷四十

墓誌銘四

卷四十一

墓誌銘五

卷四十二

祝文

卷四十三

祭文上

卷四十四

祭文下

南軒集原序

孟子沒而義利之說不明於天下中間董相仲舒諸葛武侯兩程先生屢發明之而世之學者莫之能信是以其所以自為者鮮不溺於人欲之私而其所以謀人之國家則亦曰功利焉而已爾爰自國家南渡以來乃有丞相魏國張忠獻公倡明大義以斷國論侍讀南陽胡文定公誦說遺經以開聖學其託於空言見於行事雖若不同而於孟子之言董葛程氏之意則皆有所謂千

載而一轍者若近故荊州牧張侯敬夫者則又忠獻公之嗣子而胡公季子五峯先生之門人也自其幼壯不出家庭而固已得夫忠孝之傳既又講於五峯之門以會其歸則其所以默契於心者人有所不得而知也獨其見於論說則義利之間毫釐之辨蓋有出於前哲之所欲言而未及究者措諸事業則凡宏綱大用鉅細顯微莫不洞然於胸次而無一毫功利之雜是以論道於家而四方學者爭鄉往之入侍經帷出臨藩屏則天子

亦味其言嘉其績且將倚以大用而敬夫不幸死矣敬夫既沒其弟定叟哀其故藁得四巨編以授予曰先兄不幸蚤世而其同志之友亦少存者今欲次其文以行於世非子之屬而誰可予受書愀然開卷亟讀不能盡數篇為之廢書太息流涕而言曰世復有斯人也耶無是人而有是書猶或可以少見其志然吾友平生之言蓋不止此也因復益為求訪得諸四方學者所傳凡數十篇又發吾篋出其往還書疏讀之亦多有可傳者方

將為之定著繕寫歸之張氏則或者已用別本摹印而
流傳廣矣遽取觀之盖多鄉所講焉而未定之論而凡
近歲以來談經論事發明道要之精語反不與焉予因
慨念敬夫天資甚高聞道甚蚤其學之所就既足以名
於一世然察其心盖未嘗一日以是而自足也此年以
來方且窮經會友日反諸心而驗諸行事之實盖有所
謂不知年數之不足者是以其學日新而無窮其見於
言語文字之間始皆極於高遠而卒反就於平實此其

淺深疎密之際後之君子其必有以處之矣顧以序次
之不時使其說之出於前而棄於後者猶得以雜乎篇
帙之間而讀者或不能無疑信異同之惑是則予之罪
也已夫於是乃復亟取前所蒐輯參互相校斷其敬夫
晚歲之意定其書為四十四卷嗚呼使敬夫而不死則
其學之所至言之所及又豈予之所得而知哉敬夫所
為諸經訓義唯論語說晚嘗更定今已別行其他往往
未脫藁時學者私所傳錄敬夫盖不善也以故皆不著

其立朝論事及在州郡條奏民間利病則上意多鄉納之亦有頗施行者以故亦不著獨取其經筵口義一章附于表奏之後使敬夫所以堯舜吾君而不愧其父師之傳者讀者有以識其端云淳熙甲辰十有二月新安

朱熹序

欽定四庫全書

南軒集卷一

宋 張栻 撰

詞

風雲亭詞

嶽麓書院之南有層丘焉於登覽為曠建安劉公命
作亭其上以為青衿遊息之地廣漢張某名以風雲
又繫以詞

眷麓山之面隩有絃誦之一宮鬱青林兮對起背絕壁

之穹窿獨樵牧之往來委榛莽其蒙茸試芟夷而卻視
翕衆景之來宗擢連娟之脩竹森偃蹇之喬松山靡靡
以旁圍谷窈窕而潛通翩兩翼兮前張擁千麾兮後從
帝湘江之浮渌矗遠岫兮橫空何地靈之从閔昉經始
乎今公悅棟宇之宏開列闌楯之周重撫勝槩以獨出
信茲山之有逢予揆名而諏義爰遠取於舜雩之風昔
洙泗之諸子侍函丈以從容因聖師之有問各跼陳其
所衷獨點也之操志與二三子兮不同方含瑟而鏗然

諒其樂之素充味所陳之紆餘夫何有於事功蓋不忘
而不助示何始而何終于鳶飛而魚躍寔天理之中庸
覺唐虞之遺烈儼洋洋乎目中惟夫子之所與豈虛言
之是崇嗟學子兮念此邈千載以希蹤希蹤兮奈何盍
務勉乎敬恭審操舍兮斯須凜戒懼兮冥濛防物變之
外誘遏氣習之內訐浸私意之脫落自本心之昭融斯
昔人之妙旨可實得於予躬循點也之所造極顏氏之
深工登斯亭而有感期用力於無窮

謁陶唐帝廟詞

宋淳熙四年靜江守臣張杲旣新陶唐帝祠以二月
甲子率官屬祇謁祠下再拜稽首退而歌曰

溪交流兮谷幽山作屏兮層丘木偃蹇兮枝相樛皇胡
為兮于此留藹冠佩兮充庭潔芳馨兮載陳純衣兮在
御東風吹兮物為春皇之仁兮其天四時叙兮何言出
門兮四顧渺宇宙兮茫然

公安竹林祠迎神送神樂章

神之來兮何許風蕭蕭兮吹雨悄屏氣兮若思嚴寬旌
兮來下昔公車之自南民望車以歆歆今乘駒兮入廟
亦孔悲兮若初秋月兮皎皎嚴霜兮凜凜澤終古兮何
窮噫微管吾其左衽酌荆江以為醴兮擷衆芳以為羞
歌鳴鳴兮鼓坎坎惠我民為此留神之去何所游風颯
颯挾歸輶倏昭明兮上征撫一氣兮橫九州有新兮斯
宇竹森森其在戶嗟我民兮勿傷公時來兮一顧有新
兮斯堂竹猗猗其在旁嗟我民兮勿替公顧民兮不忘

賦

遂初堂賦

洛陽石伯元作堂於所居之北榜曰遂初廣漢張某
為之辭曰

皇降衷于下民兮粵惟其常猗於穆而難名兮維生之
良翕衆美而具存兮不顯其光彼孩提而知愛親兮豈
外鑠繁中藏年煜煜而寢長兮紛事物之交相非元聖
之生知今懼日遠而日忘緣氣稟之所偏兮橫流始夫

濫觴感以動兮不止乃厥初之或戕既志帥之莫御氣
決驟以翱翔六情放而曷禦百骸弛而孰強自青陽而
逆旅暨黃髮以茫茫儻矍然於中道盍反求於厥初厥
初如何夫豈遠歟彼匍匐以向井我惻隱之拳如驗端
倪之所發識大體之權輿如寐而聰如迷而途知睨視
之匪遐乃本心之不渝嗚呼予既知其然兮予惟以遂
之若火始然而泉始達兮惟不息以終之予視兮母流
予聽兮母從予言兮母易予動兮以躬惟自反兮于理

茲日新兮不窮逮充實而輝光信天質之本同極神存
而過化亘萬世以常通嗚呼此義文之所謂復而顏氏
之子所以為道學之宗也歟吾友石君築室湘城伊抗
志之甚遠揭華榜以惟新命下交兮勿固演妙理以旁
陳探上古之眇微得斯說於遺經謂非迂而匪異試隱
几而一聽然則茲其為遂初也又豈孫興公所能望洋
而瞠塵者乎

後杞菊賦

張子爲江陵之數月時方中春草木敷榮經行郡圃意
有所欣非花柳之是問眷杞菊之青青爰命采掇付之
庖人汲清泉以細烹屏五味而不親甘脆可口蔚其芳
馨蓋日爲之加飯而它物幾不足以前陳飯已捫腹得
意謳吟客有問者曰異哉先生之嗜此也昔坡公之在
膠西值黨禁之方興歎齋廚之蕭條乃攬乎草木之英
今先生當無事之世據方伯之位校吏奔走顧指如意
廣廈延賓毬場享士清酒百壺鼎臠俎馘宰夫奏刀各

獻其技顧無求而弗獲雖醉飽其何忌而乃樂從夫野
人之餐豈亦下取乎葑菲不然得無近於矯激有同於
脫粟布被者乎張子笑而應之曰天壤之間孰為正味
厚或腊毒淡乃其至猩唇豹胎徒取詭異山鮮海錯紛
糾莫計苟滋味之或偏在六府而成贅極口腹之所欲
初何出乎一美惟杞與菊中和所萃微勁不苦滑甘靡
滯非若他蔬善嘔走水既瞭目而安神復沃煩而蕩穢
驗南陽與西河又頽齡之可制此其為功曷可殫紀況

於膏粱之習貧賤則廢雋永之求不得則恚茲隨寓之
必有雖約居而足恃殆將與之終身又可貽夫同志子
獨不見吾納湖之陰乎雪消壤肥其茸蒺與子婆婆
薄言掇之石銚瓦椀啜汁咀蘆高論唐虞詠歌書詩嗟
乎微斯物孰同先生之歸於是相屬而歌殆日晏以忘
飢

古詩

送八兄

彌旬積雨穗生耳冬壑未渠收潦水圍爐情話政爾佳
乃復歸舟行萬里三年百感卧湘城風急鷓鴣原上情
豈無他人意獨真每覺軟語溫如春少年銳氣凌八區
晚以樂義稱鄉閭聞人有急若已如天報兩子雙明珠
小隱卜築蘭溪邊脩篁喬木今參天是非榮辱不到處
卷書一榻清晝眠人言壽骨隱脩眉慶事鼎鼐供期願
豈惟宗族託軌範政倚晚節增光輝有弟有弟復何為
杜門讀書人謂癡故山未遂掃松願江頭獨立送歸時

五士游嶽麓圖

閉門六月汗如雨出門襜褕紛塵土
文書堆案曲肱臥夢逐征鴻過前浦
西山突兀不可忘勇往政須求快睹
朝暾未升起微風中流呶啞挾鳴櫓
長林秀色已在望有如出語見肝腑
意行愛此松陰直眼明還喜碑字古
高低梵釋著幽居深穩仙家開閤宇
忽看宮牆高十丈學宮峩峩起鄒魯
斯文政倚講磨切石室重新豈無補
危梯徑上不作難橫欄截出可下俯
惟茲翼軫一都會

往事繁華雜歌舞變遷返覆寧重論昔日樓臺連宿莽
邇來人物頗還舊豈止十年此生聚泉流涓涓日循除
華表何時鶴來語炎氣知不到山林茗盃蒲團對香縷
鼎來杖屨皆勝引李也亦復同步武洛陽年少空白頭
三閭大夫浪自苦一笑便覺真理存高談豈畏承卿怒
不圖畫僧聖得知貌與兒童作夸詡請君為我添草堂
風雨蕭蕭守環堵

次韻伯承見簡探梅之什且約人日同遊城東

江湖漫浪歲年晚雖有梅花誰寄遠城中可人獨吳郎
不惜日力供往返東郭枝頭玉雪明下有清淺溪流橫
新春好趁花前約莫待飄零空作惡

張安國約同賦仇氏願甕酒

人間炎熱不可耐君家甕頭春未央想當醉倒卧永日
夢遶清淮歸故鄉後生那得識此酒從君乞方還肯否
徽州作賦為歆歔荊州詩來端起予

李仁父寄伏苓酥賦長句謝之

岷峩山中千歲松枝虬幹直摩青空雪霜剝落中不槁
膏液下與靈泉通龜跼鳬伏自磊砢金堅玉潔仍豐融
篝明夜取喜得雋煮鼎朝聽如吟風杵成坐上看飛雪
更和酪乳收全功當知至味本無味子若服之壽莫窮
巽巖脊梁硬如鐵冠峩切雲佩明月百好都隨春夢空
大藥獨傳鴻寶訣中宵咀嚼不搖頭玉池生肥燕不徹
憐我百慮形蚤衰累贈扶持意何切丹砂着根謾爾傳
脂澤釀黍計已拙由來妙道初不煩此法莫從兒輩說

徑思舉袂揖浮丘下視塵世真一呖
朱顏留得亦何為
追逐同堅歲寒節

和吳伯承

一葦湘可航風濤逮春深裴臺咫尺地
勇往復雨淫窻
前幾紅藥俛首如不禁悠悠覽物化了了知予心卜鄰
得佳士問學方駸駸端如雲間鶴不受塵埃侵應門有
長鬚杖策許相尋匪為食有魚杞棗牆陰聽我清廟
詩三歎有餘音洋洋百世下斯道豈陸沉君看有本源

發端自涔涔願君勉勿倦抱膝試長吟儻臻名教樂何必懷山林新詩尚來嗣庶以貽規箴

用前韻送彪德美

嘗嗜貴知味短絆難汲深讀書不能發但自成書淫
復翻異說潢流渺難禁豈知言意外妙此惟微心初無
古今異歲月謾駸駸五峯講學地歎息風雨侵前時約
同途舊遊愴追尋鳴鳳不可見脩竹餘清陰斯文天未
喪千載發韶音春風滿天宇魚鳥自飛沉河流貫霄極

芥舟膠寸濔神交獨吾子妙處但微吟文會匪易得未
應歸故林君無泉石癖膏肓詎須箴

再用前韻

元化有萬類聖學極幾深有如亞聖賢尚謹殆與淫淺
見僅一斑歡喜不自禁豈知天地全於穆千聖心嗟哉
我學子進道宜駸駸立志務弘毅異說毋交侵仁端驗
發見精微試探尋超然見大體皎日破重陰重新鄒魯
傳挽回韶濩音當年不自勉與物終堙沉神龍倏變化

豈復顧泥濘有來南山友更唱共迭吟羣材欲封殖杞梓看成林慙慙勸學子逆耳成良箴

采菊亭

并引

陶靖節人品甚高晉宋諸人所未易及讀其詩可見
冒次灑落八牕玲瓏豈野馬遊塵所能棲集也前建
安丞張君精力未衰即掛冠家于瀏陽有年笑葺小
園為亭面南山來求予名予名之曰采菊取靖節所
謂采菊東籬下悠然見南山嗚呼靖節興寄深遠特

可為識者道耳

陶公千載人高標跨餘子豈無濟時念歛蔭獨知止歸
來卧衡門無愠復何喜九日天氣佳東籬擷芳蕊舉頭
見南山佳處政在此地偏心則遠意得道豈否張侯謝
銀魚築室娛燕几小亭才尋丈景物自新美頗聞雙瞳
清亦復強步履不妨數登臨倚杖看雲起高詠悠然篇
飛鴻送千里

送楊廷芳

金史卷一百一十五
卷一
自吾友若人歎息恨不早相逢未出語已足慰懷抱寒
牕逾浹旬百慮略傾倒霜晴不留客別語詎能好不盡
此時情梅邊試深討

又

昔人忘言處可到不可會還須心眼親未許一理蓋辭
章抑為餘子已得其最當知鄒魯傳有在文字外

又

平生風雨夕每念名節難窮冬百草歇手自種琅玕吾

子三十策字字起三歎豈欲求人知正自一心丹請哦
碩人詩匪為樂考槃

送鮮于大任入成都幕

敵騎昔飲江扁舟憶同驚翁方為國謀客以名義故安
危匪前料得失渠異趣淮壖渺風雪王事有程度息偃
多在床君車不停駐初無作難色所立詎愆素嗟我吳
門別風木歲徂暮相逢復湘城往事忍回顧獨餘後凋
心特立凜不懼莫邪雖云利寧作囊錐露善藏要有待

小試隨所遇終無缺折虞豈但走狐兔吾州得良牧民
力或可裕本根賴封殖疆索費調護從容試長思取急
無窘步作別忽草草懷抱復誰付他時下瞿唐訪我林
下屨儻於功名餘更講末後句

同遊嶽麓分韻得洗字

遊觀不作難呼舟度清泚新晴宿潦淨羣山政如洗上
方着危欄萬象見根柢寒泉自可斟況復雜肴醴高談
下夕陽邂逅玄鑰啓中流發浩歌月色在波底

送張深道

秋風木葉落送客麗譙東豈懷兒女戀愛此趣味同至
理無轍迹妙在日用中間言有不信渠自馬牛風吾子
實所畏立志高冥鴻卓然遊聖門不受異說訐切磋豈
不樂愧非斲鼻工於皇太極蘊精微浩無窮願言終玩
繹默參元化功

人言底柱險袖手不敢過孰知人心危毫釐千萬里有
來事物繁酬酢無披靡雖云應不難要且辨真偽良知

本易直天機驗所起涵濡自日新日新乃無蔽聖學非
空言要領故在此吾子端發源所進渺涯渙我雖念不
敏詎敢忘所止後會儻有時深功同舉似

留題金山寺

長江岷山來灌注天下半東行近海門勇往更瀰漫蒼
巒忽中流屹立助傑觀孤根入層淵秀色連兩岸我來
最奇絕霜月與璀璨褰衣到絕頂恍若上河漢悠然發
遐思俯仰爲三歎乾坤無餘藏今古有長筭更深寂羣

動樹杪獨鳴鶴回頭喚山僧為記此公案

送范西叔教授西歸

乃祖至和間忠謀書鼎彝但知陛下聖豈知吾言危元祐愛君語讀者猶涕洟典刑今不亡盛德故在茲歲晚予過我秀若齋房芝持身蹈規矩出語無瑕疵向來長安道詎肯舍靈龜萬里一泮宮行囊幾新詩湘山足幽勝而水清漣漪登臨豈不樂邂逅粉榆思我懶抱僻學絕絃理朱絲子獨慕千載悠然契心期豈不為我留感

此節物移臨岐撫陳編為子三噫嘻高深諒何極循求
有端倪願言勉事此奕葉光前規

王長沙梅園分韻得林字

令君五畝園不問蓬蒿深江梅忽秀發邂逅成賞音一
笑領諸客掃地坐牆陰清芳到酒面落蕊飄衣襟月去
未忍去起舞獨微吟人自賞晤耳問花亦何心花雖有
開落意則無古今須君戒勿折嘉實看成林

送邵懷英赴召

自君之西來吾徒獲三益匪惟欣晤言望見意已適俯
仰歲再更交情共金石翩然別我去寧復得此客諸公
有推轂詔下亟傳驛嘉言以填胃往覲天咫尺豈其湘
水邊而可滯六翮雖深惜別思敢後天下責嗟哉善利
途鷄鳴分舜蹠浮雲起毫釐乃有泰山隅持身與謀國
茲義貫於一君侯天資高遇事無逼迫所立凜不回舉
手謝物役保此方寸印勿受一塵隙廓然麗昭回萬象
歸指畫富貴豈君心事業追往昔贈言不能工庶以永

無數

陪安國舍人勞農北郊分韻得闌字

寒收花尚瘦風靜江不湍元戎肅千騎歷覽無留難好
景要徐出微雲故遮闌惟春布嘉惠公豈樂遊觀龐眉
八十老扶杖來蹢躅去年幸一稔何以報長官酌酒公
自勞得無有愁嘆嗟哉三章約所貴簡且寬黃堂載清
靜自覺田里安須公出妙語茲遊記不刊

安國晚酌葵軒分韻得成字

桐花三月寒風雨滿江城使君晚被酒千騎過友生名
談宿霧捲逸氣孤雲橫揮斥看墨妙笑語皆詩成人物
有如此爾輩賴主盟更呼南鄰客共此樽酒傾愛我庭
下竹頭角方崢嶸永懷冰雪姿寧復世俗情新篇一湔
袞凡木不足程願言謹封殖歲晚長敷榮

安國置酒敬簡堂分韻得柳暗六春字

桴鼓息荒村襁褓盛南畝永日省文書呼客共樽酒主
人出塵姿宛是靈和柳行歸帝所遊此地豈淹久公卧

百尺樓餘子可下瞰我每奉談塵汲古得深探身外皆
為餘此道要無憾從渠梅雨天陰晴遞明暗公憎孔壬
面怪石乃寓目夜堂發深藏林立驚滿屋我亦苦嗜此
一見下風伏何當載而歸妙策三十六堂下列絲竹堂
上娛佳賓相看夜未艾樂此笑語真風流今屬公我輩
但逡巡文章千古意翰墨四時春

同元晦擇之遊嶽道遇大雪馬上作

驅車望衡嶽羣山政參差微風忽南來雲幕為四垂炎

官挾蓐收從以萬玉妃庭燐亦何有尺璧仍珠璣奇貨
吾敢居妙意良自知林巒倏變化轍迹平高低喬松與
脩竹錯立呈瑰姿清新足遐寄浩蕩多餘思平生湘南
道未省有此奇況復得佳友晤言相追隨茅簷舉杯酒
旅榻誦新詩更約登絕頂同觀霽色時

詩送元晦尊兄

君侯起南服豪氣蓋九州頃登文石陛忠言動宸旒坐
令聲利場縮頸仍包羞却來卧衡門無愧自日休盡收

湖海氣仰希洙泗游不遠關山阻為我再月留遺經得
紬繹心事兩綢繆超然會太極眼底無金牛惟茲斷金
友出處寧殊謀南山對床語匪為林壑幽白雲政在望
歸袂風颼颼朝來出別語已抱離索憂妙質貴強矯精
微更窮搜毫釐有弗察體用豈周流驅車萬里道中途
可停輶勉哉共無斁邈矣追前脩

遊南嶽風雪未已決策登山用春風樓韻

人言南山巔煙雲聳樓觀俯瞰了坤倪仰攀接天漢勇

往愧未能長吟湘水畔茲來渺遐思風雪豈中斷行行
重行行敢起自畫歎我聞精神交石裂冰可泮陰沴驅
層霄杲日麗旭旦決策君勿疑此理或通貫

南軒集卷一

欽定四庫全書

南軒集卷二

宋 張栻 撰

古詩

陪舍人兄過陳仲思溪亭深有買山卜鄰之意
舍人兄預以顓鑿見名因成古詩贈仲思

築居湘水濱歲月亦已久寧知負郭東勝處入君手回
環烟塢深有此溪十畝朝瞰穿林薄荷氣薰戶牖堂堂
吾州牧下馬喚賓友主人故喜事一笑具穀藪汲泉泛

崇蓮洗醖傾穉酒淋漓壁間書自可傳不朽我獨留薄
莫並溪時矯首人言君不偶此豈落人後觀君眉宇間
似亦挾所有隔溪更幽絕古木蔭高阜却立望遙岑四
序列鍾貞買山吾計決便欲剪榛芳居然顓一壑豈羨
印如斗未知鄰家翁還肯見容否

送然姪西歸

堂堂希白翁其惟同出自百年詩禮傳名教有樂地嗟
予力未勝永抱蓼莪意積累蓋百艱承家豈云易惕然

履淵冰中夜耿不寐協心望爾曹勉力紹前志歲晚期
有成庶或保無墜

又

自子來見我脩焉十六秋一聞沂上音此意便綢繆中
間豈不別會合同轉頭今茲舍我去萬里不復留豈不
能挽子懼子為親憂六月送歸船我思與悠悠愛子剛
毅資不作繞指柔願子進問學琢磨須自脩居然知見
廣百病會有瘳誰謂道云遠行矣當深求

送黃子默

元祐不復見太史今諸孫人物尚論世典刑故猶存酣
歌拓金戟三年佐雄藩超然車馬中高韻獨孤騫永懷
白鷗盟修竹滿故園得句見眉睫外慕何足言顧以感
知己跋馬向脩門朝開英俊途王度待討論小試翰林
手乘槎薄崑崙我懶卧衡麓秋風擷蘭蓀交遊歎益落
拭目看騰掀軒冕豈足貴政爾名義尊執手念相聞此
意古所敦

過胡文定公碧泉書堂

入門認溪碧，循流識深源。念我昔此來，及今七寒暄。人事幾更變，寒花故猶存。堂堂武夷翁，道義世所尊。永袖霖雨手，琴書賁丘園。當時經行地，尚想語笑溫。愛此亭下水，固若玻璃盆。晴看浪花湧，靜見潛鱗翻。朝昏遞日月，俯仰鑑乾坤。因之發深感，倚檻更忘言。

次韻德美碧泉感舊之什，且約胡廣仲、伯逢、季丘來會上封。

相逢傾蓋地回首歎川上士窮不足怪但喜氣愈王凜
然歲寒姿儒林有龍象棲遲似隱君矍鑠真詩將惟應
一彈指欲了四大藏舊習想冰消豈復留餘恙新篇更
紆餘和氣與醞釀却思東魯遊幾載南陽葬風霜摧宰
木日月隨過浪豈期經世心晚歲成獨往蕭然屋半歌
使我懷抱愴獨有千載傳此事可憑仗細觀宇宙間何
得復何喪尚期浮雲開衡嶽來見狀秋壑采蘭蓀霜林
收粟稼曉看日浮空夜賞雪侵帳更憐二三友前山屹

相望文會儻來尋勝踐天所相妙理須細論長歌却雄
放褰裳詩勿疑當仁應不讓

自西園登山

雨後溪重碧木落山增明西風肅羣物感此秋氣清振
衣千崖表俯瞰萬籟生匪云幽遐慕政爾未忘情

路出祝融背仰見上封寺遂登絕頂

我尋西園路徑上上封寺竹輿不留行及此秋容霽磴
危霜葉滑林空山果墜崇蘭供清芬深壑遞幽吹不知

山益高但覺冷侵袂路回屹陰崖突兀聳蒼翠故應祝
融尊羣峰拱而侍金碧雖在眼勇往詎容憩絕頂極遐
觀脚力聊一試昔遊冰雪中未盡登臨意茲來天宇肅
舉目淨纖翳遠邇無遁形高低同一視永惟元化功清
濁分萬類運行有機緘浩蕩見根抵此理復何窮臨風
但三喟

中夜祝融觀月

披衣凜中夜起步祝融巔何許冰雪輪皎皎飛上天清

光正在手空明浩無邊羣峯儼環列玉樹生瓊田白雲
起我旁兩腋風翩翩舉酒發浩歌萬籟為寂然寄言平
生友誦我山中篇

晨鐘動雷池望日

浮氣列下陳天淨澄秋容朝曦何處升彷彿認微紅須
臾眩衆采闔闔開九重金缸忽湧出晃蕩浮雙瞳乾坤
路呈露羣物光芒中誰知雷池景乃與日觀同徒傾葵
藿心再拜御曉風

道旁見穫者

腰鎌聲相呼十百南畝穫婦持黍漿饋幼稚走雀躍辛勤既百為幸此歲不惡王租敢不供大室趣逋約雖云粒米多未辦了升餽姑寬目前飢詎有卒歲樂樂歲尚爾為一歎更何託書生獨多憂何以救民瘼

臘後一日尋梅東門外馬上遇雪

羸驂出東郭靜與幽意期尋梅冷入眼野路信所之寒萼斲未吐我自愛橫枝雪花忽排空成此一段奇歲晚

故人闊天寒鴻鴈稀南國少霜霰北山多巖薇坐看節
物改莫遣心事違角巾風獵獵日暮獨吟歸

雪中登樓分韻得未字

南州冬多溫一雪已可貴今年臘三白故足蘇品彙朝
來並危欄舉酒聊自慰翩翩着客衣漠漠亂雲氣珪璧
滿天地造物初不費更遷二三友晤賞見風味燭至僕
尚更酒苦飲亦既仍遣探梅花已折南枝未

笋脯一平馳寄因和去歲詩為一笑春笋未盛

尚續致也

權門極珍羞未辦食龍肉我家湘楚山籜龍飫奴僕淮
南戶戶有黃蘗公今徑歸亦不癡更包笋脯贈行李定
應笑殺長安兒

湖南使者邵公召赴在所寓客張某敬賦以餞
行李

公來使湘州氣象日淳美不為察察明自謂平平耳未
須走原隰但使心如水儻無耳目蔽庭戶即千里頃聞

上封章便欲返桑梓其如矍鑠姿難着湖山裏春風一
札下趣往覲天咫新渌渺滄洲揚舠一何駛士方處遠
外憂國抱蘊底寧應立君前輔車有或柅煌煌四門開
側席問民瘼百慮願畢陳高風泚餘子

次韻元晦擇之雪中見懷

流水浩無息游雲去不休我思在何許起步三徑幽男
子四方志胡爲守一丘盍簪未可期此意空綢繆平生
子朱子砥柱屹橫流探古獨遐觀萬象供雙眸結友得

林子苦心事窮搜看渠清介姿便可披羊裘昔者千里
駕共我風雪遊永言清絕景祇以好語酬居然隔年別
却喜翰墨留詩來尚記憶知子不我尤講習今難忘離
索古所憂但當勉耘耔歲晚儻可收

送甘甥可大從定叟弟之桂林

季也有行役我思獨悠悠親朋非不多子能從之遊桂
席上湘水青山挾行舟籃輿問嶺路政爾荔子秋人言
桂林好頗復類中州近郊多勝槩堆堞冠層樓待渠幙

府暇時與同冥搜吾子有令姿冒中富九流處世多齟齬但當付滄洲超然擴遐思詎可耳目謀願為百鍊剛莫作繞指柔昔人不吾欺子盍試反求預想他年歸此地復綢繆刮目看二子一笑紆百憂

湘中館餞定叟弟分韻得位字

江樓倚夜門樽酒留客醉挽衣更小語不盡今夕意吾家德義尊此豈在名位勉哉嗣芬芳停此寬別思

廣漢黃仲秉即轉運使治之東作亭扁以楚翠

蓋取杜陵所謂楚岫千峯翠者屬客賦詩

維衡屹南荒作鎮自開闢蟠根結地厚面勢倚空碧陂
陀數州境高下相接迹麓山乃其趾神秀固未極定王
十里城處處見山色知誰長在眼嗟此塵中客觀風君
獨暇延納到几席得句恍忘言寄興渺今昔自君之東
來民瘼極探索仁言徹九關寧懼虎豹厄諏詢遍南畝
民肥吾則瘠築亭一舒嘯逮此百憂隙看山儻不愧隱
几亦聊適寄語後來者此意當無數

三茅觀李仁父劉文潛員顯道趙溫叔崔子淵
置酒分韻得高字

節物歲云暮九衢塵滿袍起我二三友招要步林皋仰
看冥飛鴻俯覽千丈濤石徑上深窈竹風更蕭騷杯槃
自真率更起瀉濁醪歎我會合難慰我涉歷勞薰然鄉
社遊飲少意已陶我亦壽長者萬里欣所遭嗟哉士業
艱逝矣日月滔古義重金石外物真秋毫願言共勉勵
勿負岷山高

寒食前三日野步烏龍山中石上徃徃多新芽
手撷盈掬酌玉泉煮之芳甘特甚有懷伯承兄

賦此以寄

披雲得新腴煮泉聽松風香味自真不與餘品同悠
然泊莫留歸來隱疎鐘念昔湘濱游年年撷芳叢遲日
照高嶺新雷驚蟄龍落磴快先啜鼓腹欣策功夜燈紫
筠牕香生編簡中誰與共此樂臭味有鄰翁耄來七里
城日月轉飛蓬山川豈不好予憂日忡忡酌此差自慰

思君復無窮

六月晦發雪川廣德兄與諸友飲餞于漁山已
而皆有詩贈別寄此言謝

平生茗雪夢邂逅此登臨青山秀而遠溪水潔且深浮
玉千古色飛鳳何年音小丘闢荒蒼脩竹初成林居然
得此客領畧還披襟已歌棠棣詩更作伐木吟兄嗟弟
行役友念朋盍簪情深語更質意到酒自斟荷風生泊
莫涼雨洗遙岑翻然放舟去別緒故難任我行日以遠

佳處長會心作詩寄余韻併以謝幽尋

遊靈岩

我登姑蘇臺笑指前溪水水從具區來古色映清泚
明朝泛舟去兩岸雜蘋芷縈紆知幾曲舉目皆可喜稻熟
千頃黃秋入四山紫疎鐘度橫塘青帘穿野市忽驚秀
氣逼突兀平地起飛閣出林顛穹石滿山趾褰裳上深
徑鳴蟬聲聒耳木罽露遐觀欲進足屢止梵宮開何年
金碧煥相倚上方納湖光千里淨如砥中峯何亭亭正

爾當燕几沙閣鷗鷺微水落魚龍徙雲遶闔閭邦草迷
於越壘琴臺俯香徑不念前王侈茲山自古今詎此能
為痕老松獨堅卧根株互盤峙頽然閱滄波愛此青未
已我來三日留幽事付行李領畧寧有窮登臨聊可紀

遊惠山

茲泉幾歲月復此慰渴心諒惟獨鍾秀源委來何深在
昔抱幽獨邂逅逢賞音希聲聽者難至味乃可尋兀坐
正亭午涼風度清陰於馬有深晤三數復微吟

遊池州齊山

舊聞齊山勝抱病來登臨蒼然俯平湖秀出幾百尋穹
石天與巧脩篁近成林高攀極巉巖俯探窮竊深愛此
堅貞姿摩挲會予心憶行西湖岸亦復多巖壑頗恨人
力勝刻畫時見侵誰知醜石面乃亦變孔壬何如榛莽
間屹立長森森天然抱幽獨妙質逢賞音支筇到絕頂
孤亭指遙岑樊川有留詠兀坐一長吟

齊山石壁間見林擇之題字緬懷其人賦此

平生子林子一別今幾春寧知林壑中忽見題墨新
巉屹蒼石恍若對其人徘徊不忍去我懷誰為陳自子
來江東相去亦已邇謂當復相逢跂首日望子云何竟
差池又此隔千里憑高久佇立飛鴻渺煙水

過馬當山

千秋馬當廟千尋獅子磯寒風起崖腹慘澹含陰威孤
帆駕巨浪瞬息洲渚非忠信儻可仗神理茲不違

題車崖堂

平生乖崖公及此邦仿佛凜然風埃外餘子避英爽憶
公昔正色抗論指邪枉念當絕其根所畏日滋長晴空
轟雷霆下土走魑魍云何廊廟姿半世江海上徒令治
郡聲迄今滿天壤論相危及公亦豈坐倔彊嗟哉彼隘
俗利欲扼其吭聞公卓絕風吐舌仍儻恍豈知古之人
事業係所養臨機隨手應如爬適苛癢李侯亦高世希
蹤自疇叢萬里見丹青高堂闢虛敞琅琅壁間記讀者
興慕仰我來歲云莫霜林振餘響嘆息重徘徊題詩詔

吾黨

張子困携二子西歸求予詩為賦此以致鄉黨

之義

窮冬泝荆江風急波濤怒張君一葉舟追逐任掀舞時
從古岸邊頗得班荆語君家岷山下須眉挾風雨萬里
垂橐歸問君自何苦兩兒纔過膝秀色隱眉宇昨者試
省中旁觀正如堵誦書聲琅琅亦復記訓詁呼前與酬
答進止良應矩我為三咨嗟每見必摩拊祝君須愛惜

事業貴有序美質在陶冶如器無苦錢道遠方愁予速
成戒自古可便利欲風居然熏肺腑良心人所同愛敬
發端緒岷江本一勺東流貫吳楚但當養其源日進自
莫禦君歸閉門思予言或可取

過洞庭

城頭鷄一號浩蕩風脚回篙師起相呼牽帆上高桅我
亦推枕聽波浪聲轟厖牕間試一覘萬頃銀山開附火
且安坐念此亦快哉良久天平明已見金沙堆泊舟古

廟底喜色動輿臺我行正長夏及此歲律摧通籍恨亡
補敢賦歸去來所至有何忙妙處姑徘徊險阻元自平
鷗鳥亦不猜萬事有定理渠謾費安排明朝上湘水雪
意正栽培行矣一杯酒好在故園梅

次韻陳寺丞建除體

建議了亡補歸來謝馳驅除荒城南丘有田十畝餘滿
城車馬喧得此逃空虛平湖永晝靜泉聲雜塤竽定自
非偶然供我耳目娛執熱者誰子來浣塵土榆破顏為

我笑共看雲卷舒危機起於中胡越生同車成功妙克已八荒元一區收心試參此得失竟馬如開緘得君詩嗜好如我迂閉門君未可出處本非疎

湖南參議宋與道奉祠歸崇安里中賦此以別憶昔歲丙寅束書從吾翁驅車服嶺南弭節湟江東湟江地僻左窮年少過從邂逅傾蓋友一笑蠻煙空秋水泛孤艇春郊支短筇琴書適有餘酬唱寫不供豈惟吾曹懼固足愉親容日月遽如許于今再星終中間亦會

面別去復轉蓬歸來洞庭野乃此相逢回首歎風樹
欲語悲填曾愛君堅忍姿凜凜霜後松徐公真有常意
味與曩同而我學不進長大加愚慙幸蒙故人惠苦語
相磨礪梅霖漲宿潦行李何匆匆自云洞庭樂遠勝千
戶封將兒更抱孫綵衣映謖叢搜竒萃圖刻考古羅彝
鐘知君頗挾此詎信詩能窮同里有佳人抱獨環堵中
未妨閒暇日更共討論功他時有新得為寄冥飛鴻

嚴慶胄射策南歸迂途相訪六月二十有一日

同遊城南書院論文鼓琴煮茶烹鮮徘徊湖上
薄莫乃歸明日作別書此為贈

炎暑盛三伏駕言得清游城南才里所便有山林幽崇
蓮炫平堤脩竹緣高丘方茲閔雨辰亦有清泉流舉網
鮮可食汲井瓜自浮絲桐發妙音更覺風颼颼喜無舉
業累獨有講學憂逮子間暇日微言要窮搜譬彼治田
者黽勉在勿休但勤撫萊功勿作刈獲謀雖云千里別
豈無置書郵祝子時嗣音慰我日三秋

長沙歷冬無雪正月十日與客登卷雲亭望西
山始見一白莫夜復大作竹聲蕭然是日坐上

分韻得雲字

冬溫氣苦盞玄冥未書勲薄雪殿餘臘一夜收楚氛驩
欣想農圃潤澤到蒿芹我亦破曉出喚客來卷雲蒼蒼
西山樹棲此萬鶴羣爽氣入病眼幽懷愜前聞意到自
舉酒語多祗論文薄莫勢未已飛花復繽紛還將蕭瑟
聲一一付竹君洗醖且更酌清絕未酣醺

次韻周畏知問訊城東梅塢七首

城東幽事如許一見定勝百聞苦雨斜風無奈斷橋流水餘芬

誰知牛鐸黃鍾寡和陽春白雪如君句法飽參妙處不關言說

春意新回庭樹角聲莫起江城更著水僊為伴真成難弟難兄

可是看花不厭城南更欲城東多謝諸君著語莫教孤

負春風

堤上已垂新柳屋邊尚有殘梅雪盡春生湖水野航竟日悠哉

人情自爾變遷此道不渝燥濕未妨靜處閑觀要知二五即十

短筇遍歷溪山款段時尋鄰里遇酒聊一中之得句亦偶然耳

別離情所鍾十二章四句送定叟弟之官嚴陵

別離情所鍾會合意無數如何僅踰歲復賦弟行役歲
律亦已暮風烈雪漫漫去路阻且長念子衣裘單嚴之
水淪漪具山復蒼蒼子陵釣游地草木有餘光我昔臨
此州民容拙使君子行為多謝慰彼無毫分別駕亦何
事休戚理則同但使民受惠無論別駕功巍巍孤高亭
念我昔所喟子也時一登千載起立志

亭

某在嚴陵嘗為
宋廣平立孤高

義路本如砥利徑劇羊腸何以書子紳世德不可忘自

昔謹交際人情易因循敬始以念終君子貴守身鄰邦
呂正字質疑時以書校官有袁子苦語莫厭渠貌茲遺
體重相對子與子祝子以自愛念不忝厥初雲滿南陽
陌書藏善和宅行行重回首無使歸思隔送子目力短
朔風吹我裾心焉獨如結子也當念子

平時兄弟間十三章章四句送定叟弟之官桂

林

平時兄弟間未省別離味別時已不堪別後何由慰庭

萱既荒蕪綵綬委塵土子嘆予咨嗟寒牕夜風雨逮此
閑暇日賴有先世書與子共紉繹舍去情何如嗚呼忠
獻公典則垂後裔遺言故在耳夕惕當自厲何以嗣先
烈匪論達與窮永惟正大體不遠日用中履度如履水
猶恐有不及毫釐儻不念放去如決拾事業無欲速燕
逸不可求速成適多害求逸翻百憂南山有佳木柯葉
正敷榮願圖歲晚功大用寧小成歲晚豈不念風雨漂
搖之但當護本根紛紜爾何為嶺海坐清靜府公金玉

姿幙府省文書簡編可委蛇十步有茂草會府宜多賢
親仁古所貴更誦伐木篇聞之元城公南州宜止酒止
酒縱未能少飲還得不子行日以遠我思日以長政或
少閒暇書來不可忘

芭蕉茶送伯承伯承賦詩三章次韻

與子藝蘭九畹勝渠賜壁一雙更碾春風白雪同看明
月清江

正色可參官焙妙香還近稽山草木叢中清絕天教散

卷二
在人間

春去雲藏嶽麓梅黃雨漲昭潭政爾倚欄無那一甌喚
起清談

賦遺經閣

生世豈云晚六籍初未亡向來言外旨瞠視多茫茫隱
微會見獨如日照八荒始知傳心妙初豈隔毫芒絕學
繼顏孟溥風返虞唐讀書無妙解數墨仍尋行況復志
寵利荆榛塞康莊自云稽古功此病真膏肓君家屹飛

閣面對羣山蒼匪為登臨娛牙籤富書藏邀予為著語
會意詎可忘一洗漢儒陋活法付諸郎

三友堂

寒牕政爾念蕭瑟況復故人疎近音憑欄為子賦三友
便覺冰霜千古心

初春和折子明歲前兩詩

古今同活法妙處在阿堵浮雲不作崇白黑可坐數窮
冬掩關卧豈為作詩苦挑燈讀常編至味可深咀新春

風雨中日日鳩鳴屋小園政可步柰此泥泥足却坐問
樽酒知足乃不辱一杯徑陶然敢羨車載麴

和德美韓吏部笋詩

籜龍春雨後得勢類乘軒驟長寧嫌速駢生詎厭煩錯
連非異族蒼老見玄孫色並蒲葵扇香侵老瓦盆靜依
花影轉新帶蘚文昏外美看彪炳中虛驗晏溫出欄俄
競秀侵徑恍孤騫顚脫雖囊見森嚴武庫存風回飄粉
霧龜拆露坤垠生理知無息神功本不言牙籌誰數箇

玉斧莫傷根錯立環兵衛周羅儼翰藩危岑遙寸露睹
浪忽驚奔勁節回青眼齊觀壯小園嚴凝難奪志霖霖
合知恩蛟鰐蟠深宅牛羊隱半垣委蛇隨戶牖撐拄動
荃蓀愛惜滋千畝高低辨兩番貌真應莫稱著譜欲重
論豈止同苞茂真成後嗣繁兒童防戲折口腹謝空殮
深夜共椽燭清朝列戟門於菟真筆楗季子屢髯掀北
海雖頻設南山可盡髡深培資後賞獨倚莫消菟看取
炎歊倏清陰陰午暇

生辰謝邵廣文惠仁者壽賦

左弧念當辰藐此卧歲晚重雲不予蔭敢望滋九畹南
鄰有良朋敏質快銳建進道方駸駸吐辭看袞袞妙語
極吹噓至理屬關鍵嗟予澹泊好學植自穠裝豈能益
涓埃感子意繾綣昭然隱微中當念仁豈遠起知妙乾
體實理踐坤簡大易乃在我亘古當一本期君得真傳
永以息邪遁

南軒集卷二

欽定四庫全書

南軒集卷三

宋 張栻 撰

古詩

五月十六日夜城南觀月分韻得月字

梅收清風來宇淨寶鑑揭頻年城南游未有今夜月呼
舟泛微瀾游魚亦出沒危榭倒影浮倚檻涼入骨舉酒
屬西山寒光動林樾諸君興未已南阜上突兀目極大
江流高情更超越

三月七日城南書院偶成

積雨欣始霽清和在茲時林葉既敷榮禽聲亦融怡鳴
泉來不窮湖風起淪漪西山卷餘雲逾覺秀色滋層層
叢綠間愛彼松栢姿青青初不改似與幽人期坐久還
起步堤邊足逶迤游魚傍我行野鶴向我飛敢云昔賢
志亦復詠而歸寄言山中友和我和平詩

四月二十日與客來城南積潦方盛湖光恬然
如平時泛舟終日分韻得水字

澤國盛梅雨漲潦彌兩溪常時侵溢患乃復到城市納
湖迫西閘衝突固其理今年築隄防捷石細積累艱辛
迄崇成龜魚亦歡喜節宣有程度盈縮無壅底昨宵水
沒岸民居例遷徙走馬來問訊屹若堅城壘江濤從渺
茫湖光自清泚小舟足將泳新荷方疑疑嘉我二三客
共此風日美相期寂寞濱雅意淡如水念言隄防功得
失乃如彼而况檢身者詎可忘所止明朝更我詩斯言
或當紀

展省龍塘有作

十年衡山陰驅馬幾往還山色如故人收豎隨馬鞍
俛伏長松下清晨涕洟瀾念昔初拱把茲馬影團欒
白雲歸何時日月如轉環矯首祝融峯依前倚高寒
於馬百感集欲去良獨難

田舍

竹葉帶曉露茅簷起炊煙蛩吟枯草根犬吠壞垣邊
田家亦何營生理固足憐風霜摧我稼狼莠長我所
卒歲

復何念一飽未補前我思昔之人備豫理所先積倉徧
郊野甘雨盈公田臨風重搔首復古何由緣

舊聞長沙城東梅塢甚盛近歲亦買園其間念
欲一往未果也癸巳仲冬二十有八日始與客
遊過東屯渡十餘里間玉雪彌望平時所未見
也歸而為詩以紀之

半生客荆楚歷覽非一隅寧知城東路有此梅萬株瘦
馬路曉寒清風起菰蒲度溪上平坂頓覺景物殊霏雪

下晴晝香霧迷前驅近坡與遠嶺玉立同一區老樹固
瑰特小枝亦敷腴有如衆君子彙聚德不孤精粗無可
揀酥酪與醍醐千株未覺多此語信不誣班荆或小憩
沽酒時一斟勝賞諒難盡昭質知不渝我有十畝園丘
壑正盤紆念此縞袂侶歲晚足我娛來遊自今始琴書
與之俱回首桃李場冷淡莫邪揄

平父求筍炙既并以法授之乃用往歲張安國
詩韻為謝輒復和答

知君友竹君寧使食無肉更我脯笋詩句妙騷可僕南
公鮭菜脩父壑嗜好自爾元非癡君但將從力噉此大
勝折腰鄉里兒

題淮陰祠

秦關昔先驅南鄭豈淹久夜中丞相歸平明印垂肘古
來豪傑人調度出窠臼登壇一軍驚六合已在手從茲
看廓清指揮如運帚時艱思奇才廟古酌樽酒出門望
長淮故國長稂莠風雲正慘澹人事極紛糾拘攣儻無

累吾欲獻九九

時為桂林之役斜川前一日刑部劉公置酒相
餞曾節夫預焉既而劉公用陶靖節斜川詩韻
見貽亦復同賦以謝

通籍念無補先廬獲歸休所忻三載間暇日從公遊城
中十畝園頗復依清流渺渺送歸鴈翩翩下輕鷗駕言
欲南驚踟躕眷林丘況且遠晤言公唱孰與酬祖席近
佳日呼客仍我儔相與千載思誰復念此不新詩更紆

餘用以寬離憂他年南阜約剥啄時相求

城南有丘巋然名以南阜

他年當與公歲講是遊也

送劉樞密留守建康

整駕欲南驚乃復送公舟公行民所瞻願言勿淹留向
來秉事樞正色有忠謀坐覺國勢尊已驗權綱收如何
霖雨澤偏使及南州新春紫詔下聞者寬百憂誰昇今
重鎮百萬宿貔貅控江撫長淮聲勢接上流吾皇志經
略此地合綢繆不應萬全策歲月空悠悠先當植本根

次第施良籌未聞欲外攘而乃忽內修幕府方宏開人
才要旁搜可不念對菲惟當別薰猶留鑰豈淹人即歸
侍前旒盡舒醫國手調療會有瘳還憶遐荒守時能寄
音不

溥熙乙未春予有桂林之役自湘潭往省先塋
以二月二日過碧泉與客煮茗泉上徘徊久之
下馬步深徑洗琺酌寒泉念不踐此境于今復三年人
事苦多變泉色故依然緬懷德人游物物生春妍當時

疏闢功妙意太古前
履齒不可尋題榜尚覺鮮
書堂何寂寂草樹亦芊芊
于役有王事未暇謀息肩
聊同二三子煮茗蒼崖邊
預作他年約扶犁山下田

七月旦日晚登湘南樓

文書稍去眼日夕進微涼
高樓一徙倚清風為我長
漁父陰深越歸人度浮梁
仰看河漢明俯視羣山蒼
平生會心處於此故難忘
舊聞水東勝巖巒發天藏
豈無一日暇勇往聊徜徉
民瘼未渠補況敢懷樂康
天邊雲物

佳似復為雨祥秋成儻可期歲晚或自強當從農家鼓
一歷水雲鄉

望後一日與客自水鄉登湘南月色佳甚翌日
用鄉字韻簡游誠之

一雨五日餘南州三伏涼喚客近方沼笑譚引杯長相
將復登樓月色在屋梁念我懷百憂忽忽髮變蒼及此
少自舒觴詠未可忘孤光凜下照景妙無留藏沙邊數
白鷺欲下仍翔翔羣動亦自得如我四體康平生子游

子虛白生吉祥官舍並樓居登臨筋力强未可效王粲

居然思故鄉

誠之所屈正在樓旁自中憂以來每攜書獨登

定叟弟生朝遣詩為壽

我昔在嚴城惟子桂林思舊游復更踐相望仍今茲行
止不可期會合何參差況乃近重九清杯憶同持想子
撫初度難忘蓼莪詩而我獨東向慙懃頌期願祝子以
愛身永佩過庭規勉子事遠業昔賢以為師安車按節
度中道行逶迤他年老兄弟鶴髮仍龐眉歲晚話平生

期以無媿辭及此良未易兢兢願同之

八月既望要詳刑護漕游水東早飯碧虛徧觀
棲霞程曾龍隱諸巖晚酌松關放舟過水月洞
月色佳甚逼夜分乃歸賦此紀遊

離江即湘江戢戢清見石其東列羣峯秋色碧復碧日
出霧露收草徑上逼側憑欄揩望眼已足慰疇昔更窺
巖穴勝創見為驚咋如何數里間竒觀相接迹寬同屢
屋深劃若巨靈擘日月遞光景風雲變朝夕石橋幾年

成乳竇時一滴神龍舊隱處仰視多辟易蛻迹凜猶存
隱隱印霜脊下有澄湫深餘波漱蒼壁往者已仙去來
者此其宅薄晚扣松關風過聲索索聊麾車騎退容我
且散策卻望訾家洲輕舫度前磧回首煙樹林已復掛
蟾魄宇曠淨餘滓羣物被光澤何所寄遐思空巖皎虛
白清輝可一規水色相激射天邊與川上亭亭如合璧
居然廣寒游不用假六翮班坐依微澗晤賞共佳客因
之想千載詎有今古隔簫鼓歸夜闌觀者繁城陌往往

羅杯杵班班見殺核諒因年歲豐人意少舒適視爾意
少舒於予亦忻懌

次韓機幕韻

韓杜有佳句炯炯如辰星自昔此邦勝中土亦飫聽奇
觀今愈多洞戶長不扃秀色真可餐腴澤到畦丁寒巖
度輕舫瘦嶺着危亭固已小鴈蕩寧復談錦屏自我來
擁麾每思御風冷如何半載間足迹才一經居然俯仰
中便覺塵慮冥舊刻暗蒼蘚往事過奔霆頗聞煙霞外

往往接神靈向來羽衣士吐內誇奇齡終焉亦歸盡難
留鬢毛青塞鴈度霄漢沙鷗飛遠汀大哉天壤間逍遙
各隨形人生亦何有泛若水上萍勿作分外念但勉明
德馨乘時各努力日馭不我停夢回故園好蘭菊羅中
庭從知靖節醉遠勝次公醒

秘閣鄭公移節鄉部置酒餞別詩以侑之

嗜僻寡同好意合難語離傾蓋今幾年盍簪愜心期況
復王事同退食陪委蛇窺君肺腑中落落無藩籬獨有

見義勇褰裳欲從之憂時多苦語懷古更餘悲坐使嶺
海間冰雪映清規我拙倚君重孤懷良自知正如乘霧
行不覺蒙其滋人生豈無別念此尤依依維閩號蕃庶
今亦因繭絲平時里社游耳目到隱微想當入境初不
待褰車帷畫綉匪所榮民瘼要深醫看培邦本強詎止
鄉國肥還歸報明主廟論資扶持願堅歲寒節慰我別
離思

清明後七日與客同為水東之游翌朝賦此

平生山水癖妙處只自知夙約常寡味邂逅愜心期幅
巾與藜杖安步隨所之竭來坐官府頗覺此願違城頭
望羣峯欲往類絆羈三春苦風雨晴日一伸眉沙邊散
車騎竹輿從嘔咿獨與三四客野服相追隨亭高俯空
曠洞古探瓊竒懸崖隱日月幽壑蟠蛟螭澗水雜鳴佩
松風發清吹興來卽傾酒語到亦論詩聊指簿書眼償
此閒暇時所歷固未厭所感多餘思昔遊木葉下今茲
綠陰肥江山雖可識歲月迺如馳素餐豈不念懷安敢

云私歸來耿不寐歌枕聽晨鷄

題榕溪閣

寒溪澹容與老木枝相樛其誰合二美名此景物幽太
史昔南驚於馬曾少休想當下榻初清與耳目謀品題
得要領亦有翰墨留我來訪遺址密竹鳴鉤輶稍令舊
觀復還與佳客遊樹影散香篆水光泛茶甌市聲不到
耳永日風颼颼所忻簿書隙有此足夷猶平生丘壑願
如痼不可瘳雖知等喧寂終覺靜理優更思濯滄浪榕

根浮小舟

送陳擇之

君能千里來乃作觸熱去涼秋幸非遙歸計無已遽向
來文字間講論有平素及茲共王事益得君佳處幾微
獨深窺圭角本不露豈期寂寞濱獲此友朋助吾邦雖
云僻山水足奇趣更期休沐晨相與窮杖屨匆匆何少
悵咄咄出別語君懷負丞恩行矣當及戍我亦念歸歟
霜天收粟芋後會未可期往事屢回顧贈言復何有獨

以此道故寥寥千載前達者同一路所趨固絕塵所履
無虛步臨深覺居高仰止有餘慕要須學滄溟匯此百
川注他年儻相憶訪我城南圃無使歲月深永思編簡
蠹

止酒

淵明通達士止酒乃成詩終焉未能忘寄意良在茲勇
哉典午君覆觴無再期念彼萬乘貴艱難有深思況乃
一介士而或志可移被齋揆前訓剛制聖所辭銘心諒

無數多言亦奚為

斜川日雪觀所賦

行客念故里勞者思少休如何歲華新尚爾天南游涉
五遇佳日品題自名流聊復揩病眼沙邊玩輕鷗和風
着冠巾春意動林丘緬懷千載人孤高諒難儔亦有一
二士舉酒相勸酬未知吾故園草木如此不政拙甘下
考智短空百憂賜歸儻蒙幸舊盟良可求

靜江歸舟中讀書

南風駕小雨羣山淨如沐吾歸及新涼所歷慰心目
軋柔櫓鳴卧見山起伏推枕意悠然還取我書讀平生
領解處於馬更三復老矣百念疎但欲斯境熟向來五
嶺游日力半更牘小心了官事終覺媿惇獨世路自險
夷人情費追逐翩翩孤飛翼息蔭望林麓

張子真楊政光吳德夫追路湘源賦此以別

驅車出巖關觸熱歸路長一雨羣物蘇吾行亦清涼
離水自南去湘流正洋洋眷言二三友跋馬勤送將蕭然

短長亭每語夜未央張子名家駒千里方騰驤楊郎嶺
中彥而能歛鋒鏑延陵舊所熟氣味固難忘向來幕府
遊三秀麗齋房居然出別語分袂楚粵鄉人生會有別
勿悲參與商獨有贈言意臨歧更平章風俗易移人宦
途劇羊腸千鈞有不守決去飛鳥翔要當勉自持詩書
作金湯他年相會處刮目看增光為謝桂父老無澤留
一方惟餘石間字時與洗苔蒼

登江陵郡城觀雪

黃雲澹四垂飛雪忽無際排空風力靜整整若有制穿
林初着花點瓦已成毳低連七澤波遠接關河勢憑城
領竒觀壯思起病滯四年領邊州氣候苦多盭清秋日
昏昏仲冬雷虺虺雪花有時零轉首即開霽及茲洗瘴
眸天公豈無意為邦抱百憂但願得豐歲對之一欣然
不飲心已醉春前尚餘臘三白或可冀更約竹間梅共
作歲寒計

正甫還長沙復用斜川日和陶韻為別

吾黨有佳士寡欲自日休眷言平生心從我萬里游披
雲度嶺嶠犯雪臨江流顧我無定蹤飄然若輕鷗茲行
雖云遠所忻近故丘況得與君俱豈患寡朋儔有酒君
為飲有句君能酬如何舍我歸頗亦念此不我老百念
冷獨有謀道憂臨歧無他祝簡編細研求

子遠使君出守廣漢始獲傾蓋諸官賦詩贈別
某廣漢人也故末章及之

半生落南州分與岷峨踈竭來荆江上所忻近鄉閭吾

鄉多雋豪雜還來舟車時從說情話頗覺中懷舒中間
識胡公粹美真璫璣心遠氣自靜語簡意有餘向來有
推轂入校中祕書名場萬夫立人亟我則徐拳拳抱忠
愛百慮纔一攄白雲已在望思親惜居諸乞州枌榆邊
政以便版輿同舍挽不住清風挾歸裾觀君進退間此
豈為名譽春帆肯小駐論交良慰予愛君秉質高且復
富蓄儲任重則道遠願言勿踟躕吾州得賢救父老想
樂胥我亦有一廛徑思歸荷鋤

李仁甫用東坡寄王定國韻賦新羅參見貽亦

復繼作

三韓接蓬萊祥雲護山頂涵濡雨露春吞納日月景美
陰背幽壑靈根發竒穎艱難航瀚海包裹走湖嶺仙翁
閱世故未肯遽生癭相期汗漫游歲晚共馳騁願持紫
團珍徃扣黃庭境想翁面敷腴玉色帶金井芸芸納歸
根湛此方寸靜清規照濁俗不惑類揚東懸知藥籠中
此物配丹鼎從今談天舌不用更澆茗

外弟信臣總幹西歸駐舟沙岸得半月之款於
其行口占道別

外家源流遠文物被諸孫嗟我數年來頗識佳弟昆酥
酪本同味蘭芷非殊根競爽有如此知當大其門信也
來過我氣貌清而溫方忻駐足地中有靜者存皎然明
月光豈復受濁渾埴麤迭和時此理試共論

廬山有勝處曰卧龍南康朱使君始築茅繪諸
葛武侯像於其中以書屬予賦詩寄題此篇

廬山僊靈宅佳處固非一頗聞卧龍勝幽深諒難匹懸
瀑瀉琮琤石壁兩翠峩草木被光輝波瀾動回沒今年
朱使君下馬恍若失徘徊領妙趣指點築茅室為愛卧
龍名英姿慨超軼於焉儼繪事長風起蕭瑟髣髴梁父
吟尚想翁抱膝慘澹風雲會飄忽日月疾獨存經世心
千載詎可汨褰裳欲從之雲濤渺寒日


淳熙四年二月既望靜江守臣張某奉詔勸農
于郊乃作熙熙陽春之詩二十四章章四句以

示父老俾告于其鄉之人而歌之

熙熙陽春既發既舒翼翼南畝是展是圖嗟爾農夫各
敬乃事往利爾器誠爾婦子惟生在勤勤則及時惟時
之趨時不爾違祈祈甘雨膏我下土習習谷風和澤乃
普徃即爾耕惟力之深徃時爾苗勿倦其耘于日于夕
自遂自達爾心勿忘彼生孰遏惟天之心矜我下民民
不違天使爾有成既穰既實既堅既好爾獲既周先養
爾老保爾家室撫爾幼穉既迄有年復思嗣歲嗟爾父

老其訓其誠俾務於本惟土物愛不念其本則越其思
所思既越害斯百罹嗟爾父老其告其喻爾之有生君
實覆汝尊君親上其篤勿忘小心畏忌率于憲章嗟爾
父老教之孝悌孰無父母與其同氣反于爾心孰無愛
敬即是而推烏往不順嗟爾父老勿替諄諄其未率從
驚厲其身告以禍患其使知懼無俾蹉跎以陷罪罟惟
國之法熒熒其垂使爾知避豈欲爾施爾或自陷予疚
予恫曷使予懷寘于爾衷於赫聖主敷德流澤布宣弗

廩時予之責咨爾父老助予念茲豈予之助報國是宜
粵以今日勸相于郊乃作此詩以懋爾勞咨爾父老尚
演厥義其諷其歌于鄉于里俾一其心服我訓言擊鼓
坎坎自古有年



南軒集卷三